

# PAGMATOTO

**ANG MGA PAGTULON-AN SA ANG DALAN SA KINABUHI** gipahiluna aron sa paghatag kanimo sa kahinam sa pagsusi sa Biblia ingon nga *kinatibuk-an*, ug sa samang higayon sa pagklaro sa kalainan nga gikinahanglan ang pagsabot sa Pulong sa Dios. Sa pagtabang kanimo sa pagbaton sa huna-huna sa mga puntos nga kinadak-an, labing gikinahanglan ang pagtuon sa mga bersikulo diin makita sulod sa mga pagtulon-an, busa gikinahanglan gayod kanimo ang hingpit nga paggamit sa Biblia alang sa pagtuon niini nga kurso.

**TUN-I PAG-AYO ANG MAPA.** *ANG DALAN SA KINABUHI* nagangalan sa kinadak-ang dalan diin ang tanang tawo nga nahimugso nagapanaw niini nga kalibutan. Ingon nga ang matag-usa nagalakaw niini nga kinabuhi, ang uban nagbaton sa dalan sa pagtoo sa kinabuhing walay katapusan; ang uban usab nagapadayon nga walay pagtoo ug nagapabiling patay sa Espiritu. Ang tanang tawo nagalakaw uyon sa mga panghitabo niini nga kinabuhi. Busa usa lamang ang kinatibuk-an nga dalan ang gihulagway. Ang mapa nagasugod sa pagsulod sa tawo sa kalibutan, ug natapos sa katapusang hulagway sa tawo dinhi sa kalibutan diha sa pagkatapos sa usa ka libo (1000 years) ka tuig nga paghari ni Cristo Jesus sa kalibutan. Sa pagpadayon pinaagi sa mga pagtulon-an, imong makita nga ikaw sama sa usa ka magpapanaw, nagasugod diha sa Tanaman sa Eden ug nagapanaw ngadto sa Gingharian nga walay katapusan.

**TUN-I PAG-AYO ANG MGA SULAT SA BIBLIA.** Daghang kasayuran sa kasulatan ang gihatag sa pagpadayag kanimo nga ang tanang gipasundayag sumala sa Pulong sa Dios. Ablihi ang imong Biblia sa magatu-on ikaw sa matag pagtulon-an. *Tan-awa ug basaha pag-ayo ang kasayuran sa Biblia.* Sa pagpangita sa *Juan 3:16* diha sa Biblia, nagpasabot: ang libro ni Juan, *capitulo 3, bersikulo 16.*

**ANG BAHIN NGA SAG-ULOHON** gihatag uban sa mga pagtulon-an. Sag-uloha kini nga mga bersikulo aron ikaw makabaton ug tabang sa pagkasayod sa Pulong sa Dios ug sa pagpasundayag niini ngadto sa uban.

**LIMA KA GAGMAY'NG BASAHON ANAA NIINI NGA CORSO.** Matag gagmay'ng basahon adunay lima ka mga pagtulon-an sa Biblia. Matag pagtulon-an dunay mga pangutana nga imong pagatubagon human ikaw magatu-on sa maong pagtulon-an. Human nimo makompleto ang tanang pagtulon-an sa gagmay'ng basahon, ang imong palid pasulit pagagradohan ug ibalik kini kanimo uban ang sunod nga basahon. Human matun-i ug magraduhi ang lima (5) ka mga gagmay'ng basahon, makadawat ikaw sa imong kuha niini nga pagtulon-an. 70 o pataas ang pasado. Usa ka sertipiko ang ihatag niadtong malamposong makahuman sa *ANG DALAN SA KINABUHI*. Makahimo ka sa pagpangutana. Palihug kontaka kami ug among tubagon ang imong mga pangutana.

**SA DILI PA MAGSUGOD** ang matag pagtulon-an, pag-ampo sa Dios sa paglamdag sa imong kasingkasing ug hunahuna aron ikaw makasabot sa kamatuoran nga imong pagatun-an. Kami maga-ampo nga ang panalangin sa Dios maangkon nimo kon ikaw magalakang sa pagsusi pag-ayo sa Iyang Pulong.